

# «Corona ha era prendì il schlantsch da scriver»

La Chasa Editura Rumantscha durant l'onn da corona

SANDRO BUCHLI/FMR

■ **La Chasa Editura Rumantscha (CER) ha publitgà ier ses rapport annual. L'onn passà èn vegnids vendids passa 2800 cudeschs rumantschs.** Quai saja tenor la manadra da la Chasa editura Rumantscha *Anita Capaul* in dumber stabil en cumparegliaziun cun l'onn avant. La CER ha pudì edir tschintg novs cudeschs, ina reediziun e plirs e-books. La FMR ha fatg quatter dumondas ad *Anita Capaul*.

**FMR: L'onn passà è stà l'onn da corona. Tge è stà spezial per la Chasa Editura Rumantscha?**

**Anita Capaul:** La lavur vi da las publicaziuns è stada la medema sco tschels onns. Quai che ha natiralmain mancà durant quest onn è il contact cun il public ed ils auturs. Be paucas occurrenz han gi lieu pervi da corona. Nus ans avain stuì adattar a la situaziun ed a las prescripziuns. Tschertas vernissaschas avain nus però tuttina pudì organisar – simplamain en furma «ibrida». Per exempel la vernissascha dal nov cudesch da *Viola Cadruvi*: Il discurs cun l'autura ha gi lieu «live» en la biblioteca chantunala avant in pitschen public. E cun in livestream digital han tut ils interessads pudì guardar l'occurrenza en la rait. Quai ha funcziunà bain.

**Ina chasa editura sto avair auturas ed auturs che scrivan. Co statti tar la**

**CER, avais vus anc avunda manuscrifs?**

Gea, nus avain anc manuscrifs e cudeschs ch'èn sin rucca, per exempel il cudesch da giubileum da Flurin Camathias ed ils raquints dad Anna Ratti che vegnan publitgads questa stad. L'onn passà n'avain nus dentant betg survegnì dapli manuscrifs che auters onns. Ins avess gea pudì pensar che cun il lockdown avessan auturas ed auturs gi dapli peda per scriver. Ma quai n'è betg stà il cas. Er tar autras chasas edituras è quai sumegliant. Corona ha era prendì il schlantsch da scriver.

**Il giubileum da 10 onns da la chasa editura, fundada dal 2010, è damai dà en l'aua. Prenda la CER anc suenter questa «festa»?**

La chasa editura aveva previs da far ina turnea da giubileum – e quella n'avain nus betg pudì far. Ma nus avain tuttina pudì render attent a noss giubileum. Per exempel cun ina contribuziun en la Taggesschau u cun filmins da purtret ch'èn da vesair sin youtube. Plinavant avain nus fatg l'atun in'acziun da cudeschs en tuttas scolas rumantschas. Nus na levain en quest senn betg «celebrar» noss giubileum. Ma simplamain far nossa lavur

sco chasa editura e mussar preschientscha. E quai è gartegià bain uschia.

**E la ultima dumonda: Tge giavisch la manadra da la Chasa editura per la litteratura rumantscha?**

Fitg simpel: Auturas ed auturs che han gust da prender enta maun il rispli ed il palpìri – e van cun curascha e slantsch vid raquintar istorgias ed exprimer lur maini.

E vinavant: in public che appreziescha cudeschs rumantschs, leger è adina ina bun'idea!



**Anita Capaul (san.) e la collavuratura Karin Kohler-Pattis èn cuntentas cun l'onn da gestiun 2020, malgrà la crisa da corona.**

FOTO CER

## Midadas en il gremi editorial

Tar la cumissiun da program da la CER datti duas midadas persunalas. Cuntanschi la limita dal temp d'uffizi en il gremi han *Annetta Ganzoni* e *Renzo Caduff*. Da nov en la cumissiun èn ils romanists *Toni Vinzens* e *Valeria Badilatti*. Al cussegl per las ediziuns per creschids appartegnan: *Ursus Baltermia*, *Andrea Luzius Rassel*, *Bettina Vital* ed ussa ils dus novs *Toni Vinzens* e *Valeria Badilatti*.

Al cussegl per ils cudeschs per uffants e giuvenils appartegnan vinavant: *Petronella Cavegn*, *Annalisa Schaniel* e *Barbara Cuffaro*.